

ԳԵՈՐԳ ԾԱՌԱՅ ՅԻՍՈՒՍԻ ՔՐԻՍՏՈՍԻ ԵՒ
ԱՆՀԱՍԱՆԵԼԻ ԿԱՄՕՔՆ ԱՍՏՈՒԾՈՅ Ե-
ՊԻՍԿՈՊՈՍԱՊԵՏ ԵՒ ԿԱԹՈՒՂՈՍԱՄ
ՄԵՆԱՅՆ ՀԱՒՈՅ ԾԱՅՐԱԳՈՅՆ ՊԱՏՐԻ-
ԱՐՔ ՀԱՄԱԶԳԱԿԱՆ ՆԱԽԱՄԵԾԱՐ
ԱԹՈՌՈՏ ԱՐԱՐԱՏԵԱՆ ԱՌԱՔԵԼԱԿԱՆ
ՄԱՅՐ ԵԿԵՂԵՑԻՈՅ ՍՐԲՈՅ ԿԱԹՈՒՂՈՍԷ
ԷԶՄԻԱԾՆԻ

Շնորհազարդ Կաթողիկոսի Տանն Կիլիկիոյ Տ. Սահակայ, Կա-
թողիկոսութեան Տանն Աղթամարայ, Պատրիարքութեան Ս. Ե-
րուսաղէմի, Ամենապատիւ Սրբազան Պատրիարքի հայոց Թուրքիոյ,
Գերաշնորհ Արքեպիսկոպոսաց, Գերապատիւ Առաջնորդաց և Ե-
պիսկոպոսաց, Հոգեշնորհ Փոխանորդաց, Բարձրապատիւ վարդա-
պետաց և վանահարց, և միաբանական ուխտից, արժանապատիւ
քահանայից, մաքրակենցաղ կուսանաց, շնորհունակ սարկաւազաց
և դպրաց համօրէն մանկանց եկեղեցւոյ, բարեջան երեսփոխանաց
և անդամոց կրթական, բարեգործական, կուլտուրական, արհես-
տադիրական, որբախնամ և այլ ամենայն Աստուածահաճոյ հաս-
տատութեանց, ընկերութեանց և միութեանց, ժրջան հոգա-
բարձուաց և ուսուցչաց, յոգնեռանդն վաստակաւորաց ի գրական
աշխատութիւնս, ջանասէր մանկանց երկուց սեռից դպրոցաց,
աշխատասէր վաճառականաց և արհեստաւորաց, քրտնաթոր եր-
կրագործաց և չինականաց և առհասարակ ընդհանուր հաւատա-
ցիւոց հայկազեան սեռի արանց և կանանց, ծերոց և տղայոց,
մեծի և փոքու, ձեզ, որք ի մայրենի երկրի բնակեալք և որք
ի տար աշխարհ սփռեալք սահեալք նժդեհութեամբ, և որք ի մէջ

այլալեզու և այլակրօն ազանց տարազրեակալք, ողջոյն սիրոյ և խաղաղութեան հասցէ ի Միաժնաէջ և փրկական Ս. Կաթողիկէէս և ի Ս. Լուսաւորչին մերոյ Աջոյս:

Ոչ որպէս կամին մարդիկ այնպէս առնէ Տէր, այլ որպէս ինքն կամի. և զկարէ հասու լինել անքննին խորհրդոց նորա:

Մինչ պատանի էի և ուսանէի ի պետական դպրանոցի, ձայն Տեառն կոչեաց զիս ի սպասաւորութիւն Տանն իւրոյ, քառասուն և չորք ամք են, յորմէ հետէ որպէս սպասաւոր Հայաստանեայց Ս. եկեղեցւոյ կատարէաք զպէսպէս պաշտամունս ըստ կոչմանս և ըստ աստիճանիս և արածէաք զհօտն հաւատացեալն ի մեզ: Երկիցս հաճոյ եղև Տեառն կարգել զՄեզ աւանդապահ կարգաց և գրութեանց Ս. եկեղեցւոյս յետ մահուան հոգելոյս և երջանկայիշատակ Հայրապետացն Տ. Տ. Մկրտչի Ա. և Մատթէոսի Բ. և մինչ կատարէաք զ'ի վերայ Մեր եղեալ զպարտիս, ըստ չափու կարեաց Մերոց, կամ եղև Տեառն յերեքտասաներորդի դեկտեմբերի անցելոյ ամի ի ձեռն Համազգական Ժողովոյն կոչել զՄեզ յԱթոռ սրբոց առաքելոցն Թադէոսի և Բարդուղիմէոսի և սրբոյ Հօրն մերոյ Գրիգորի Լուսաւորչի և յառաջներորդում աւուր յուլիսի ամսոյ ներկայ ամի ընկալաք զօծումն Հայրապետական ի Միաժնաէջ Կաթողիկէ Մայր Տաճարի: Խոնարհեալ առաջի կամաց Հօրն երկնաւորի և պատկառ կացեալ համազգային ընտրութեան, գամք ի վճարել զ'ի վերայ Մեր եղեալ զսրբազան պարտիս առ եկեղեցին Հայաստանեայց և առ ազգն հայոց:

Սարսիմք և զարհուրիմք ի յուշ ածելն եթէ քանի՞օն ծանր են պարտիք, բազմազիմի հոգք Հայրապետի ամենայն Հայոց: Սակայն յիշելով զբանն աւետարանական, զպատուիրանն Փրկչին մերոյ, եթէ լուծն Նորա քաղցր է և բեռն փոքրոգի, նաև ունելով առաջի աչաց զի ի պաշտաման Մերում չեմք միայնակ, այլ ունիմք լծակից Մեզ զՇնորհազարդ եղբայրն Մեր զԿաթողիկոսն Տանն Կիլիկիոյ, զամենապատիւ Պատրիարքունս Հայոց Երուսաղէմի և Կ. Պօլսոյ, զԱռաջնորդս և զսրբագումար Միաբանութիւն Մայր Աթոռոյս, զՊաշտօնատարս կրօնական, վարչական, կրթական և ամենատեսակ հաստատութեանց մերոց, քաջալերիմք և հաւատամք եթէ օգնականութեամբ եղբարց և զաւակաց Մերոց կարեմք լցուցանել զպէտս կարեաց Հայաստանեայց Առաքելական Ս. եկեղեցւոյ և ըստ կարողութեան Մերում սնուցանել զԺողովուրդն Հայոց ի վայրի դալարութիւն և առ ջուրս հանգստեան:

Եւ արդ, զօտեալնդեալ այսուհաւատով և յուսով, նախ զիմեմք առ Շնորհազարդ եղբայրդ Մեր ի Քրիստոս սրբազան Կաթողիկոսդ Տանն Կիլիկոյ: Լծակից եղբայր Մեր, տեսանեմք զտառապանս և զվիշտս հօտին հաւատացելոց ի Ձեզ յերեսաց տգիտութեան, աղքատութեան և այլոց դառն հանգամանաց, որովք և Դուք տառապիք և հոգք անհնարինք ծանրանան ի վերայ Ձեր, վասնորոյ աղաչեմք զԱստուած լինել օգնական և զօրաւիգ Ձեզ առ ի ամօքել զվիշտս և զտառապանս ժողովրդեան ի մխիթարութիւն Մեր, Ձեր և համօրէն ազգիս:

Սրբազումար միաբանք Պատրիարքական Աթոռոյ Վանուցն սրբոց Յակովբեանց. տեղիդ, յորոյ վերայ կայք, սուրբ է և նուիրական, և աչք բազմաց հաւատացելոց ի ձեզ հային: Լերնէք օրինակ բարեաց և քրիստոնէական ջերմեռանդութեան ամենայն ուխտաւորաց, զի հանապազ յիշեսցեն պատկառանօք զսուրբ տեղիսդ և զմիաբանութիւնդ զօրացեալ ի հաւատս քրիստոնէականս:

Ամենապատիւ Պատրիարք Կ. Պօլսոյ, սիրելի եղբար մեր, և արժանընտիր անդամք ազգային, կրօնական, և քաղաքական ժողովոց կենդրոնական վարչութեան Հայոց Թուրքիոյ. հոգ և տառապանք մերազնէից երկրիդ բազմաթիւ են և բազմապիսի, զորս զժուարանամք թուել մի առ մի. աղօթեմք առ Աստուած տալ ձեզ զօրութիւն և զզօնութիւն ըստ տեղւոյն և հանգամանաց թեթեւացուցանել զդառնութիւն հայ ժողովրդեան երկրիդ անդատապարտ մնալով առաջի Աստուծոյ, խղճի ձերոյ և ազգի:

Առաջնորդք եկեղեցւոյ, արքեպիսկոպոստունք և եպիսկոպոսունք, աղաչեմք նախքան զամենայն ի միտ առնուլ զվհուութիւն պարտուց աստիճանիդ, զոր ունիք: Գոլով գլուխ ուխտի եկեղեցւոյ վիճակիդ և տեսուչ ժողովրդեան, պարտ է ձեզ նախ առնել և ապա ուսուցանել. ցուցէք զճանապարհն արդարութեան ի ձեզ հաւատացեալ սրբազնագործ պաշտօնէից և ժողովրդեանդ, արթնութեամբ և հռանդեամբ եղերուք հետամուտ, զի եկեղեցիք, որպէս Տուն Աստուծոյ, լիցին ի վայելուչ բարեկարգութեան, անտեսութիւն եկեղեցեաց ի բարեկարգ վիճակի, կրթական հաստատութիւնք, որպէս որրան կրօնական-բարոյական դաստիարակութեան, ի վերայ բարձանց կոչման իւրեանց: Յուցէք ամենայն ստորագրեալ պաշտօնէից իւրաքանչիւրում զիւր պարտիս, քանզի որպէս տեսուչք թեմօրէից, զթերութեանց և զանկանոնութեանց ունիք համարս տալոյ Աստուծոյ, Մեզ և ժողովրդեան: Որպէս զե-

կալար գործոց թեմականաց, պատուիրեմք ամենայն աչալըն-
թեամբ զհետ լինել, զի գործք և գործառնութիւնք կատարեսցին
արդարութեամբ և փութով: Օժանդակ եղերուք թշուառացելոց, մը-
խիթարիչ վշտացելոց և սատարող կարօտելոց, զի ըստ աւետարանին,
որպէս շահեցուցանողք տաղանդի ի ձեզ հաւատացելոյ, արժանի
լինիցիք լսել. «ծառայ բարի և հաւատարիմ, քանզի ի սակաւուդ
հաւատարիմ ես, ի վերայ բազմաց կացուցից զքեզ»:

Առ ձեզ են բանք մեր, ով քահանայք, որ յետ եպիսկոպոսաց
երկրորդ էք ի մէջ ժողովրդեան. առ ձեզ գան ամենայն կարօտեալք
և վշտացեալք, առ ձեզ դիմեն վասն հոգեւոր գործոց և եկեղեցական
սրբազան խորհրդոց, հանապազ ունիք անարգել ել և մուտս
ի տուն ծխոց ձերոց և որպէս հայր հոգեւոր, ի ձեզ հաւատան
զգաղտնիս սրտից իւրեանց և առաջի ձեր բանան զբարոյական
և զնիւթական վէրս իւրեանց, վասնորոյ յորդորեմք ձեզ մի
տայք երբէք իւրք անկանիլ արատոյ ի պաշտօն ձեր, այլ արի-
աբար, յոժարակամ սրտիւ, առանց ծուլութեան կատարեցէք
զպարտիս ձեր գահամանակն ի սուրբ հարց՝ զժամակարգութիւնն
անթերի կատարեցէք, առանին և հրապարակական քարոզութեամբ
պահեցէք միշտ զգաստ զփոքրիկ հօտն ձեր ի բարեպաշտական
և աստուածահաճոյ գործս. մի լիցի ձեզ խեթիւ հայել առ միմեանս
և վասն տրոց կամ ընչից զժկամակութիւն սերմանել, այլ որք
աւագագոյնքն են ի ձէնջ և զարգացեալք, պարտին շահել զկրտ-
սերագոյնսն և զտկարամիտսն: Ըստ Ներսիսի Շնորհալոյ մի ոք
ի ձէնջ սիրեացէ գտգիտութիւն ուսման յաղագս ծուլութեան կամ
աշխարհական զբաղմանց, թէ և ոչ կարէ ոք ամենայնիւ կատար-
եալ լինել, սակայն հարկ է ի կարեորան անթերի լինել:

Յետ հոգեւոր քարոզութեանց ի ձեռն հոգեւորականաց, զե-
կալարողք մտաց ժողովրդեան դուք էք, ով պատուական հրա-
պարակախօսք, զբականագէտք և մատենագիրք, ի ձեզ հային ըն-
թերցողք մատենից և լրագրաց, ի ձէնջ ակնկալեն զճշմարիտ
նկարագիրս երևոյթից և զճշգրիտ բացատրութիւն նոցին, հաւա-
տան և հետեին ամենայն ասացելոցդ: Արդ, աղաչեմք զԱմենա-
կարողն Աստուած, զի դուք լցեալ պայծառ իմաստութեամբ, լի
ազգասիրութեամբ, լինիցիք քարոզիչք ճշմարտութեան և առաջ-
նորդիցէք զմիտս ժողովրդեան ի բարին և ի քաղաքակրթութիւն:

Մեծատունք և աւագք, առ Ձեզ ուղղեմք զխօսս Մեր, դուք,
որ ճոխացեալ էք ամենայն բարութեամբք աշխարհիս զորս հաճոյ

լեալ է Պարգևողին բարեաց տալ ձեզ առատաբար, հասուցէք աշխատաւորաց ձերոց ըստ վաստակաց իւրեանց, յիշեցէք զերանելին զՅոր և զհայրն Արրահամ, որք առատք էին ի տուրս, հասպտղ պաշտէին զՏէր և զոհանային զՏուողէն ամենայն բարեաց: Հանէք մասն և բաժին ի գործ ժողովրդական և այդու բարեգործութեամբ արարէք ձեզ քսակս առանց հանաւոյ և զանձանաւկաս յերկինս. և երկնաւոր Հայրն ամենեցուն տեսանելով զգործս ձեր բարիս, հասուցէ ձեզ պատսնադատիկ:

Առ ձեզ ևս ունիմք յորդոր ուսուցիչք և դաստիարակք, քանզի ի ձեզ հաւատացեալ են մատաղերամ մանկութե ազգիս: Հայր և մայր փոյթ ունին զգարգացմանէ մարմնոյ զաւակաց իւրեանց. հոգեկան և մտաւոր զարգացումն ի ձեզ է յանձն եղբաւ: Դուք էք դաստիարակք և կրթիչք, դուք էք մարդիչք նոցա ի պէսպէս գիտութիւնս և ի բարոյական կրթութիւնս: Արդ, յաւանդելն զպէսպէս գիտութիւնս, կրթեցէք զհոգի մանկանց երկիւղիւն Աստուծոյ, զի ի տղայ տիոց ընտելացեալ բարի գործոց, առ յապայն լինիցին բարի անդամք հասարակութեան: Փոյթ ունիցիք վարժել զմանկտիս երկուց սեւից ի լինել աշխատասէր ի մտաւորական պարապմունս, բարի և սիրող առ ընկերակիցս, կարգապահ և համեստ ի զնացս և ոչ միայն բանիւ բերանոյ, այլ և օրինակաւ անձի ձերոյ եղերուք դաստիարակք:

Ի դաւառս հայոց ժողովուրդն մեր գտանի յանձուկ վիճակի և խարխափի ի տգիտութեան, ոչ կարէ անթերի լցուցանել զպէտս և զկարիս ընտանեկան անհրաժեշտ պիտոյից և ոչ հոգ տանել ուսման մատաղերամ զաւակաց իւրեանց, բայց ուրախութեամբ սրտի տեսանեմք, զի օր ըստ օրէ յառաջանան և զարգանան ի տեղիս տեղիս բարեգործական, կրթական, կուլտուրական, գիւղատնտեսական և այլ ազգաշահ և օգտակար հաստատութիւնք: Արդ, օրհնեմք զվաստակս ամենայն ընկերութեանց. յորդորեմք զանդամս և զվարչութիւնս նոցին, զի լի եռանդեամբ աշխատ լիցին արդիւնաւորել զնպատակ ընկերութեանց և այդու նմանողք սամարացւոյն Աւետարանի: Եթէ ըստ բանի Փրկչին արուցանողն բաժակի միոյ ջրոյ ոչ կորուսանէ զվարձս իւր, ապաքէն Խրչափ ևս առաւել դուք, որդեակք Մեր, արժանի լինելոց էք վարձուց վասն ժրջան վաստակոցդ:

Լուարուք և դուք, ժողովուրդ երկրագործ, որ տքնիք զօրն հանապաղ, ծանր են աշխատանք ձեր, սակայն օրհնեալ են վաս-

տակ ձեռաց ձերոց, որովք լցուցանէք զպէտս անհրաժեշտ կարեաց ամենեցուն: Աղօթեմք առ ամենաբարին Աստուած պողարեր առնել զանդ և զանդաստան ձեր ազատ պահելով ի վնասակար պատահարաց: Աշխատ լերուք տալ որդւոց ձերոց զուսումն և զգիտութիւն, փոյթ ունիցիք բանալ ի շէնս ձեր դպրոցս և զեղեակն բարեգարգել, քանզի զարգիս ի դժուարին պարագայս կենաց գիտութեամբ և ուսմամբ զինեալ մարդիկ միայն և եթ կեան և անկարօտ զիրս ունեն: Սիրով, խաղաղութեամբ և համերաշխ գործակցութեամբ կարէք լինել բարեկեցիկ:

Յորդոր կարգամք առ ձեզ, դստերք մեր, տիկնայք և օրիորդք, պարկեշտութեամբ և բարեձևութեամբ կեց՛ջիք, որպէս վայել է քրիստոնէական բարեպաշտութեան. զարգարեա՛լիք զանձինս ձեր ոչ ոսկւով և արծաթով, այլ ամօթխածութեամբ և առաքինի վարուք, զհետ լիջիք ի դաստիարակութիւն մանկանց, քանզի մայրն է, որ ուսուցանէ զաւակաց զառաջին բառս արտաբերել, զգուհոք և սիրով ուսուցէք զնոսա քաղցր բառբառ:

Հուսկ ուրեմն առ ձեզ դառնամք, միաբանք Ս. Էջմիածնի աննդակից եղբարք Մեր ի Քրիստոս, ցանկութիւն Մեր է յոնսանել զձեզ եռանդուն յաղօթս. ողորմութեամբ և սրբութեամբ վառ պահեալ զլոյս հաւատոյ լապտերաց ըստ օրինակի իմաստուն կուսանացն: Զինեալ առաքինութեամբ՝ սպասաւորել Սեղանոյ սրբոյ, որպէս ուխտեալ էք ի ձեռնադրութեան: Մանաւանդ յուշ ամեմք ձեզ, զի ի պէսպէս պաշտօնս ի վիճակս, զառաջնորդութեանց ասեմք և զփոխանորդութեանց, ի ձէնջ կարգին պաշտօնեայք, ուստի պարտիք ձեր են ընտելացեալ ի կրօնաւորական կենցաղս, ի պաշտաման լինել օրինակ համեստութեան, ներողամտութեան, անյիշաչարութեան, հիւրաւիրութեան և ըստ ամենայնի առաքինի վարուց. կուռ զօրութեամբ ջանալ ի շահ Ս. Կաթողիկէ Էջմիածնի և ժողովրդեան, և աջակից Մեզ, ի կատարելն Մեր զծանր պարտիս, որք եղան ի վերայ Մեր կամօքն Աստուծոյ, ցանկութեամբ համայն ազգի Հայկազեան և միաբանական Ուխտիդ:

Իսկ Մեք, ըստ երգման մերում, զոր նախ քան զսուրբ Օծումն երգուաք առաջի Ս. Սեղանոյ Միածնաէջ Տաճարիս, փառով հաւատարիմ կարգաց և կանոնաց ի նախնեաց մերոց հաստատելոց և աւանդութեանց Ս. Առաքելական Եկեղեցւոյս Հայաստանեայց, ի նոյն յորդորեմք և զսիրելի զաւակունսդ: Ծառայեցուք Տեառն սրտի մտօք իւրաքանչիւրն ըստ աստիճանի, ըստ շնոր-

հաց և ըստ կոչմանն. վասնորոյ աղօթեմք առ Ամենաբարձրեալն Աստուած, զի զօրավիզն լիցի մեզ ամենեցունց ի կատարելն զպարտիս մեր. չքանիլ ի նեղութեան և ի պատահարաց, այլ միշտ առ Աստուած յուսալ և համբերութեամբ և սիրով տանել զխաչն մեր: Ժողովուրդ հայոց, որ չհայեցեալ ի տկարութիւն անձինս, եղեր ի վերայ Մեր զհովուապետական պարտիս, աղօթեսցիք վասն Մեր, զի Տէրն մեր Յիսուս Քրիստոս զօրավիզ լիցի Մեզ ի կրել զծանր խաչն և հաւատամք, զի լուիցէ Տէր ձայնի աղաչանացդ և պահեսցէ զՄեզ վասն Եկեղեցւոյ իւրոյ: Ամէն:

Տեսաւ կոնդակս յամի շնորհաց Փրկչին 1912, 29 սեպտեմբերի և ըստ Թոմարիս ՌՅԳԲ. ի հայրապետութեան մերում Ա. Թմի Քրտրատեան Մայր Աթոռ Ս. Էջմիածնի. ի Վաղարշապատ:

ԳԷՈՐԳ Ե. ԿԱԹՈՒՂՈՍ
ԱՄՆԱՅՆ ՀԱՅՈՅ